

初一刻生书甫毕，总管传太后旨命上见起，是日山西荐医汪守正初次请脉也，余等退饭而出。写对。门人潘作霖、沈曾植来，前十年以银十两押得沈宗……批《前汉》一部，沈曾植其胞侄也，即举以还之，亦一段佳话。绍彭书来，知今日汪方。两寸虚软，左关缓兼微滑，右关缓，重按稍大，两寸主一身之气，虚软则气弱不能运行，诸阳脾胃因之不健，若左关缓而微滑，肝即失其常升之度，而尺见静，本元尚为强固，令拟助气整脾，正气清阳一升，自可日见有功。人参（八分）、麦冬（一钱）、生耆（一钱五分）、茯苓（一钱，米泔炒）、山药（一钱五分）、白芍（一钱）、醋炒柴胡（四分），炙甘六分。成都守徐肖坡景轼来谈。

七月朔（8月6日） 晴朗，热，早凉，风有秋意。读好，午初多即退。入署，看摺奏。吉地、营房。出城答朱梧冈凤梯未晤。杨子通以画扇见贻，并求题其尊人临古帖。门人卢庆云来，直籍粤东人。极言粤人伍秩庸者熟洋人律例，有志气，非征召不至，不应诸侯之聘也。孔广钟来，于式枚来。得荣侄六月廿三函。

初二日（8月7日）（立秋。未刻。）晴热。方系薛福辰、汪守正、李德立、庄守和、李德昌同拟，仅有脉状，未言病情。人参（八分）、麦冬等，似汪所开也。读好，午初一退。新放江宁遗缺府魁元书农，行一。来见，刑部司员翻书房出身。盛旭人来谈。得徐雨之函。访晤王夔石长谈。写南信，明日发。十三号。殿庐小屋绝湿暗，开小门本有通气。

初三日（8月8日） 晴热。方按云脉多半至，系气太旺，照原方，以冬术易茅术加竹叶。读好，生书毕先退。由西长安门出城，赴汴生、子禾两公南泡之约，南泡者，彰仪门外三里许荷花池也，余到时主人未到，倘佯数刻，有小舟可坐，客为徐季侯、钟陆音、钱湘吟、朱敏生、许筠安及余，湘吟最后来，饮甚畅，薄暮始入城，且尽一日欢耳。

初四日（8月9日） 晴，毒热。见两方。一党参、元参等，撤人参、黄耆，五人所开。戌刻一方按云谷气下坠，竟是补中益气汤，仅太医三人，无薛、汪名。读好，午初一退。入署挥汗画诺。松侄来，李新吾来。写对，夜为新